

TRUEBA-REN ERIOTZAN.

Zure liburuetan
 ¡O Chanton prestua!
 Maitatzen ikasi det
 Geure sort-lekua.
 Zenbait gauz miragarri
 Dituan gordetzen
 Bertan bizi, bizirik
 Diguzu agertzen.
 Euskal-mendiyetako
 Neskatill lirañak,
 Gizon leyal, azkarrak
 Ta andre biargiñak,
 Baserricho zuriyak,
 Landa loratsuak,
 Sagasti, gaztañadi,
 Ibar ta basuak,
 Oituera garbiyak,
 Ipuñak... kondaira...
 Zuregatik munduan
 Ezagunak dira.

Euskaldun-bandera,
 Zuk dezu jasotzen,
 ¡Jainkoa eta Foruak!
 Goraki deitutzen;
 Orregatikan bada
 Zure eriotzak
 Naigabez bete ditu
 Euskaldun-biotzak.
 Nun nai zabaldurikan
 Bizkaitik aiziak,
 Abandoko kanpaien
 Deadar tristiak,
 Negar egiten dabe
 Euskaldun-mendiyak,
 Negar zelai ederrak,
 Negar iturriyak,
 Landetako loreak,
 Saroiko choriyak...
 Negarrez urtu dira
 Kristauen begiyak.

JUAN KARLOS GERRA-KOAK.